

Lege 15: una lege bona ma est pretzisu a la praticare

Sa Lege 15/2010 est a beru unu programa reale de crèschida e podet torrare a fàghere mòere totu s'economia agrìcula de sa Sardigna.

Sa lege, difatis, a bandas de su pastorìu, pertocat àteros setores chi cantu a custu sunt in crisi e chi, duncas, ant bisongiu de torrare a mòere pro asseguare cumpetitividade a sas impres: sa laurera, sos setores de s'ortalìtzia, de sa frùtora, de sa bide, de sos porcos, de sos bùbulos, de sas energias rinnovàbiles, e gasi sighende.

Una lege pro cantu bona non balet a nudda si non benit praticada.

Finas a oe duos artìculos ebia sunt istados praticados: s'art. 1 e s'art. 5. Finas si non mancant problemas pro los pònnere in pratica a beru.

Pro su chi pertocat s'art. 1 "Sostegno del comparto ovicaprino" galu non est istada cumpletada sa graduatòria cun cussas dimandas chi a cumintzu sunt istadas postas a bandas pro errores formales; non ant agatadu istiba pro sos caseifitzios minores chi, non podent rispetare sa norma chi narat de s'assotziare intro su 31 de maju 2011 a una OP o a una cooperativa; infines mancat galu sa delibera chi pertocat s'antìtzipu de sos contributos pro su 2011 e pro su 2012 chi, a su chi narat su Protocolu de intesa firmadu su 05.11.2010, sa Giunta Regionale at promìtidu de pagare intro su mese de abride de su 2011.

Si cheret amentare, galu, chi pro su 2011 in sa Lege Finantziària b'at petzi 8 mln€, cando sa Lege 15 ne ponet 10 mln.

Pro su chi pertocat s'art. 5 "Miglioramento dell'offerta produttiva" non b'at galu sa delibera chi inditet sas maneras pro dare sos contributos pro su 2011 chi, a su chi narat su Protocolu de intesa numenadu in antis, sunt pro su binu 5 mln€, pro s'ortalìtzia e sa frùtora 3,5 mln€ e pro sos porcos 1,5mln€.

Totu sos àteros artìculos, chi in curtzu sighint, pro como non sunt praticados.

Art. 6 "Programma di aiuti alimentari a favore dei paesi in via di sviluppo": galu no est istadu amaniadu perunu documentu pro gastare sos 6 mln€ chi bisongiant pro comporare casos DOP de dare a sos paisos in via de isvilupu.

Art. 7 "Diversificazione produttiva": cust'artìculu, inue b'at 8 mln€, no est istadu galu praticadu.

Art. 8 "Potenziamento della filiera agroalimentare": pro cust'artìculu puru non b'at galu sa delibera (chi deviat èssere fata intro 15 dies dae sa lege), chi devet nàrrere comente devet funtzionare su Fundu de 5 mln€ a s'annu dae su 2011 a su 2013.

Art. 9 “Ripristino delle condizioni di mercato”: non s’ischit nudda de su pianu produtivu de su Cunsòrtziu de tutela de su casu romanu (de fàghere intro 3 meses dae sa lege); non b’at galu, finas si sa Giunta Regionale at fatu una delìbera su 27.12.2010, s’Osservatòriu de su pastorìu

Art. 11 “Sostegno all’aggregazione di materie prime e mangimi”: sa lege at postu 500.000 € a s’annu dae su 2011 a su2013, ma non b’at dinare in sa Finantziària.

Art. 12 “Impianto per la produzione di energia rinnovabile nelle aziende agricole”: finas si sa delìbera 47/9 de su 31.12.2010 at dadu 7 mln€ a sa SFIRS S.p.a., pro aumentare su Fundu regionale de garanzia e controgaranzia pro sas PMI chi trabballant in Sardigna, non s’ischit galu nudda de comente devet funtzionare su Fundu.

Art. 13 “Sostegno del comparto cerealicolo”: non est istadu fatu nudda pro favorire s’acordu de filiera pro sa laurera. B’at 4 mln€ a s’annu dae su 2011 a su 2013.

Art. 20 “Centri raccolta latte e macelli mobili”: custu articulu puru no est istadu praticadu e non s’ischint galu comente ant a bènnere guvernados sos ammatzatojos e sas istruturas pro collire su late.

Art. 21 “Valorizzazione delle produzioni ovine”: nudda est istadu fatu pro su programa de isperimentatzione pro sa traciabilidade de s’angione IGP e pro su programa pro produrre late de berveghe finas in istiu.

Art. 23 “Crediti di gestione e misure per favorire l’accesso al credito”: in sa Lege Finantziària non b’at dinare, pro sos cunsòrtzios fidi, chi diat bisongiare pro agiudare sas impresas de trasformatzione e cumertzializatzione de produtos agrìculos chi trabballant in Sardigna, a otènnere crèditu.

Sa RAS, in prus, cun sa firma de Protocolu de intesa numenadu, s’est impignada a intervènnere in su MIPAF pro chi custu:

- decratret s’istadu de crisi de su pastorìu;
- torret a introdurre s’ammassu privadu de su casu romanu;
- apogiet in custa fase de ammaniu de sa PAC a pustis de su 2013 su reconnoschimentu de insularidade de sa Sardigna.

Nudda de custu est istadu fatu.

Infines sa RAS at pigadu àteros impignos, chi finas a como non sunt istados mantesos, pro:

- abbèrrere una tratativa cun s’Istadu pro reconnòschere su printzìpiu cuncretu de sa continuidade territoriale de sos produtos;
- si mòvere pro suspèndere sos pagamentos de sos dèpidos agrìculos a s’INPS e a Equitalia;

- torrare a fàghere sa cumissione a tempus suo incarrigada de chircare solutziones pro sos dèpidos agrìculos (L.R. 44/88).
- abbèrrere unu cunfrontu intre sas partes, a livellu regionale, pro definire unu preju de su late cunforma a sa resa e a sa caliade, su cuntratu-cuadru e su cuntratu-tipu pro a sa filiera ovicaprina gasi comente est istadu fatu a livellu natzionale;
- torrare a bìdere s'artìculu 68 del su Regulamentu CE n. 73/2009 a manera chi s'agatent àteras solutziones a favore de su pastoriu;
- acontzare su PSR a manera chi podat garantire su dinare pro totu su tempus de programatzione de sa misura de s'indennidade cumpensativa;
- abbèrrere unu cunfrontu pro sa misura noa a su postu de cussa de su benessere animale;
- finantziare una lege de settore noa, cando chi sa Lege Finantziària 2011 non ponet perunu dinare;
- abbèrrere unu cunfrontu pro faeddare a finu de sa situatzione de sos Cunsòrtzios de Bonifica.

Amus pèdidu a su Presidente de sa Giunta e a s'Assessore a s'Agricoltura un joviu pro fàghere un'anàlisi de sa LR 15/2010 pro fàghere mòere deretu sas partes chi non sunt galu praticadas pro dare un'isperu a unu settore chi est patinde meda.